

# Impurtanta distincziun per Caminada

Premi d'art e d'architectura da la confederaziun

DA CLAUDIA CADRUVI / ANR

■ **L'architect Gion A. Caminada retschaiva il Prix Meret Oppenheim 2010. I sa tracta d'in dals impurtants premis d'art e d'architectura en Svizra.** L'uffizi federal per cultura surdat dapi diesch onns il Prix Meret Oppenheim. Cun il premi vegnan onurads artists svizzers, architects u intermediars d'art sur 40 onns che prestan lavurs cun in'actualitad speziala per l'art contemporan, scriva l'uffizi da cultura en sia comunicaziun dad ier. Il premi è dotà cun 35 000 francs per mintga artist e vegn surdà ils 17 da november en il Palace a Son Gagl. Insemen cun l'architect grischun vegnan premiads ils artists *Yan Duyvendak*, *Roman Signer*, *Claudia e Julia Müller* e la curatura *Annette Schindler*.

Caminada saja en sasez il cuntrari d'in «global architect» e tutina haja el ina tenuta che valia sco model global. Sia architectura sa basia sin il lieu, sin la cuminanza e sin la tradiziun archi-



**Il professor ed architect Gion A. Caminada ha gia recaltgà in tozzel premis nazionals ed internaziunals.**

MAD

tectonica. Tuttina na possedian ses bajetgs nagut nostalgic, ma bain stettian cun omduas chommas en il temp dad oz. «Caminada è oz cun buna raschun in dals architects svizzers che survegn la pli gronda atenziun sin champ internaziunal», scriva l'uffizi da cultura.

I saja ina satisfacziun da retschaiver quest premi impurtant, di Caminada a l'ANR. Cun sia lavur saja el trasora a la tschertga d'insatge nov e sa movia tranter visivns, utopias e la realitad.

*Gion A. Caminada* è naschì il 1957. El ha l'emprim fatg in emprendissadi da scrinari. Suentar ha el fatg studis supplementars a la scola d'art applitgà ed a la Scuola politecnica federala (SPF/ETH). Il 1998 ha el avert ses biro d'architectura a Vrin. Dapi il 2005 è el professor a la SPF a Turitg.

Il 2006 aveva era *Peter Zumthor* retschavì il Prix Meret Oppenheim. Il premi ha ses num da la lirica ed artista surrealista Meret Oppenheim ch'è morta il 1985 a Basilea.